



«ГҮЛДЕНСЕ АУЫЛ, ГҮЛДЕНЕДІ ЕЛІМІЗ» САЯСИ БАҒДАРЛАМАСЫ



«АУЫЛ» партиясы

21.06.2024

МАЗМҰНЫ

ПРЕАМБУЛА	3
БІЗДІҢ ҚҰНДЫЛЫҚТАР	3
Дәстүрге құрмет.....	4
Отбасы қоғамның негізі ретінде	4
Мәдени мұраны сақтау	4
Шынайы отаншылдықты дамыту	4
Қоғам негізі – адал азамат.....	4
1-БӨЛІМ: ЭКОНОМИКАЛЫҚ СТРАТЕГИЯ	5
1.1. Экономикалық саясат қағидалары.....	5
1.2. Кәсіпорындар мен инновацияларды қолдау.....	6
1.3. Еңбек қатынастары	7
2-БӨЛІМ: АУЫЛДЫ ҚОЛДАУ	7
2.1. Ауылды аймақтарда тұрақты инфрақұрылым құру.....	7
2.2. Экологиялық тұрақты ауыл шаруашылығын қолдау	8
2.3. Ауыл кәсіпкерлігін дамытуды қолдау	8
2.4. Ауыл туризмі мен экомәдени бастамаларды қолдау.....	9
3-БӨЛІМ: ӘЛЕУМЕТТІК САЯСАТ	9
3.1. Зейнетақы жүйесін реформалау.....	9
3.2. Білім беруге қатысты тәсіл	9
3.3. Денсаулық сақтау және әлеуметтік қамсыздандыру	10
3.4. Отбасылық саясат.....	10
4-БӨЛІМ: ЖАСТАРДЫҢ ЖАҢА САПАЛЫҚ ҚАСИЕТІН ҚАЛЫПТАСТЫРУ ЖӘНЕ ОЛАРДЫҢ БАСТАМАЛАРЫН ҚОЛДАУ	11
4.1. Жастар арасында еңбекке құрметті насихаттау.....	11
4.2. Тұлғалық дамуға қажетті білім ортасын қалыптастыру	11
4.3. Жастардың инновациялық бастамаларын қолдау.....	11
5-БӨЛІМ: МЕМЛЕКЕТТІК БАСҚАРУ МЕН ӨЗІН-ӨЗІ БАСҚАРУ ЖҮЙЕСІН ЖЕТІЛДІРУ	12
5.1. Әкімдерді сайлау: шынайы өзін-өзі басқаруды дамыту.....	12
5.2. Сот жүйесі: ашықтық және сайланбалық	12
5.3. Қоғамдық қауіпсіздікті жетілдіру	13
ҚОРЫТЫНДЫ	13

ПРЕАМБУЛА

XXI ғасыр басы қазақстандықтар үшін жасампаз еңбек, тарихи кемелденген мемлекет пен демократиялық белсенді қоғам құру кезеңіне айналды. Біз осы уақыт аралығында халқымыздың даналығы мен төзімділігі арқасында қазіргі заманның сын-қатерлеріне ұтымды жауап бере білдік.

Қазақстандықтардың ұлттық мәдени дәстүрлерді сақтаған, сонымен бірге сенімді түрде заманауи инновацияларды пайдаланатын дамудың жоғарғы сатысындағы гүлденген мемлекет құруға қажетті әлеуеті бар. Халқымыздың тарихи құндылықтары, мүмкіндіктері мен әлеуеті Қазақстан келешегін бүгіннің өзінде айқындап отыр.

Мұндай ұстаным «Ауыл» партиясынан өз қызмет ету механизмдері мен тәсілдерін ұдайы жетілдіруді, ақпараттық кеңістікте мейлінше белсенді жұмыс істеуді талап етеді.

Біздің партияның миссиясы – әрбір қазақстандыққа лайықты өмір сүруге мүмкіндік жасау.

Біз еліміздің гүлденуіне, Қазақстанның әрбір азаматының әлеуәкатының артуына өз үлесімізді қосып келеміз, қоса да береміз.

Біз тұрақты келешек қалыптастыру жауапкершілігін өз мойнымызға алуға, осы жолда жетістікке жету үшін тер төгуге дайынбыз.

Біз отандастарымыздың мүдделері үшін жауапты шешімдер қабылдауда өзге саяси күштермен диалогқа ашықпыз.

БІЗДІҢ ҚҰНДЫЛЫҚТАР

Көз ілеспес шапшаңдықпен өзгеретін қазіргі кезеңде жылдам әрі ұтымды дамуды қамтамасыз етудің негізгі факторы – қоғамымыздың құндылықтары.

Біз еліміздің іргелі құндылықтарын қолдаймыз. Олар – тәуелсіздік пен отаншылдық, бірлік пен ынтымақтастық, әділдік пен жауапкершілік, заң және тәртіп, еңбекқорлық пен кәсіби біліктілік, жасампаздық пен жаңашылдық. Бұл құндылықтар біздің қоғамдық құрылыстың берік әрі мықты іргетасын қалыптастырады.

Оларға қосымша ретінде біз өз құндылықтарымызды тек бағыттаушы жұлдыз емес, сонымен қатар салауатты және гүлденген қоғам қалыптастырудың негізі ретінде басшылыққа аламыз. Өзгерістер уақыты инновацияларды талап етуі мүмкін, бірақ сақталған құндылықтар келешекте өз жемісін беретін мүмкіндіктердің түптамасы болуы тиіс.

Дәстүрге құрмет

Біз ата-бабаларымыздан қалған мұраның құндылығын және ұлттық бірегейлігіміздің қалыптасуындағы дәстүрдің рөлін мойындаймыз. Біз өзіміздің ұлттық санамызды сақтап, ұлттық құндылықтарымызды зайырлылық қағидаларына негізделген қазіргі мәдени нормалармен үйлесімді түрде біріктіруге тиіспіз.

Отбасы қоғамның негізі ретінде

Отбасы қоғамның маңызды әрі іргелі бөлшегі. Біздің бастамалар дәстүрлі отбасылық құндылықтарды қолдауға, дені сау және тұрақты отбасылар санының өсуіне жайлы жағдай жасауға бағытталған.

Мәдени мұраны сақтау

Қазақстанның мәдени әралуандығын көздің қарашығындай сақтап, келешек ұрпаққа жеткізу қажет. Алға сеніммен қадам басу үшін біз өз мәдени мұрамызды жан-жақты дәріптеп, кең ауқымда танытуымыз керек.

Шынайы отаншылдықты дамыту

Отаншылдық – жалаң ұран емес, ол – жүрек тереңінен бастау алатын сезім. Отаншылдық адамның өз ауылындағы, үйі, ауласы мен қаласындағы тазалық пен тәртіпті бақылаудан, қоғамдық кеңістікке жауапкершілікпен қараудан басталады. Біз еліміздің келбетін жақсартуға, оның дамуына нақты істерімен өз үлесін қосатын шынайы отаншыл азаматтарды тәрбиелейміз.

Қоғам негізі – адал азамат

Адал азамат дегеніміз – өз еңбегімен лайықты жетістікке қол жеткізген, адалдық пен әділеттілікті барлығынан жоғары қоятын адал адам. Біз прогрессивті ұлтқа айналу үшін өзіміздің барлық күш-жігерімізді адал азаматтарды қалыптастыруға жұмсаймыз.

1-БӨЛІМ: ЭКОНОМИКАЛЫҚ СТРАТЕГИЯ

«Ауыл» партиясының экономикалық стратегиясы Қазақстанды аграрлық державаға айналдыруға және деурбанизацияға негізделген.

Қазақстанның аграрлық державаға айналуы агроөнеркәсіптік кешен мен ауылдық аймақтар әлеуетін толық ашатын жағдайды қалыптастыру арқылы қамтамасыз етіледі. Мемлекеттің ақша-несие, салық және кедендік-тарифтік саясаты ауыл шаруашылығын дамытуға бағытталатын болады.

Деурбанизация біз үшін тек қалалықтардың ауылды жерге көшуі емес. Біз қала мен ауылдың өмір сүру деңгейіндегі алшақтықты қысқарту арқылы ауылдық жердің өмір сүру мен еңбек етуге ыңғайлы орта ретіндегі маңызын арттырамыз. Ол үшін біз заманауи технологияларға, білімге, медициналық қызмет пен инфрақұрылымға ауылда қол жеткізуге жағдай жасаймыз. Бұл өз кезегінде ауылдық аймақтың сақталуына, ауыл шаруашылығының дамып, тұрғындардың өмір сүру сапасының артуына ықпал етеді.

1.1. Экономикалық саясат қағидалары

Партия экономикалық саясатының басты мақсаты – халықтың әл-ауқатын арттыру және өмір сүру сапасын жақсартуды қамтамасыз ету. Ол үшін біздің экономикалық саясатымыз келесі ұстанымдарға негізделеді:

1) экономиканы мемлекеттік саясаттың мақсаттары мен басымдықтарын негізге ала отырып, жоспарлы дамыту қағидаты. Жоспарлау мемлекетке тұрақты экономикалық өсім, әлеуметтік тұрақтылық және табыстың әділетті бөлінуі сияқты ортақ мақсаттарға қол жеткізу үшін экономикалық үдерістер мен экономиканың түрлі секторларының қызметін тиімді басқаруға мүмкіндік береді;

2) агроөнеркәсіп кешені мен ауылдық аумақтарды дамыту басымдығы. Бұл – ауыл шаруашылығын дамытуға, ауылда өмір сүру мен жұмыс істеу жағдайларын жақсартуға ерекше назар аударылып, айрықша ресурстар жұмсалады деген сөз. Аталған қағидат ауыл шаруашылығын дамытуға арналған шаралар, фермерлер мен ауыл кәсіпкерлерін қолдау, ауыл инфрақұрылымына, білім беру мен денсаулық сақтау салаларын инвестициялау, сонымен бірге ауыл жастары үшін жұмыс орындарын ашып, мүмкіндік жасау сияқты қадамдарды қамтиды;

3) жер қатынастарын жетілдіру. Жер тек халыққа тиесілі – бұл біз үшін аксиома. Жерге иелік ету құқығы Қазақстан азаматтарынан өзге ешкімге берілмеуі тиіс.

Сонымен бірге Қазақстан азаматтығынан шығу автоматты түрде жерді пайдалану құқығынан, бірінші кезекте ауыл шаруашылығына арналған жерді пайдалану құқығынан айыруды білдіруі тиіс;

4) ауылдық жердегі кооперацияға тірек болу. Кооперация ресурстарды пайдалану тиімділігіне, шағын және орта бизнестің дамуына, сонымен қатар әлеуметтік теңсіздіктің қысқаруы мен әлеуметтік ынтымақтастың нығаюына ықпал етеді. Біз бизнесті ұйымдастырудың кооперативтік формаларын қолдау үшін Конституцияға тиісті түзетудің енгізілуіне бастамашылық етеміз;

5) экономиканың аграрлық секторының экологиялығы. Бұл қағидат экологиялық тұрақты технологиялардың өндіріске енгізілуін, ауыл шаруашылығын жүргізудің органикалық әдістерін, су ресурстары мен агрохимикаттарды тиімді пайдалануды бақылауды білдіреді. Аграрлық сектордың экологиялығы биологиялық әралуандықтың сақталуына, халық денсаулығы мен ауылдық аймақтардың тұрақты дамуына ықпал етпек.

1.2. Кәсіпорындар мен инновацияларды қолдау

Біздің партия кәсіпорындардың дамуы мен инновацияларды ынталандыру үшін жайлы орта қалыптастыруды жақтайды. Бұл үшін біз еліміздің жаһандық экономикада бәсекелестікке қабілеттілігін жақсартуға бағытталған бастамаларды қолдаймыз.

Біз ауыл шаруашылығы өнімдерін, азық-түлік тауарлары мен терең өңдеу кәсіпорындарын ынталандыратын салық саясатына, оның ішінде қосымша құн салығына тыйым салуға қол жеткізетін боламыз. Сонымен қатар, партия отандық ауыл шаруашылығы өнімдерін экспорттаушылар үшін түсінікті және ашық тетіктер жасау мақсатында ауыл шаруашылығы өніміне ішкі квота тетігін енгізу жөнінде шаралар қабылдайды. Біз бұл қадамның азық-түлік қауіпсіздігін қамтамасыз етуде, жергілікті өндірушіні қолдауда, бағаны реттеуде, инвестицияларды ынталандыру мен импортқа тәуелділікті азайтуда айтарлықтай басымдықтар беретініне сенімдіміз.

Отандық экономиканың бәсекелестікке қабілеттілігін қамтамасыз ету мақсатында Қазақстан аумағындағы жаңа инновациялық өндірістерді қолдау да маңызды мәселелердің бірі саналады. Сондықтан біз коммуналдық тарифтерді бекіту мен жаңа инновациялық жобалар, әсіресе әлеуметтік маңызды азық-түлік тауарларын өндіру үшін белгілі уақытқа дейін жеке салық салу бойынша мемлекеттік кепілдікті енгізуге бастамашылық жасаймыз.

Біз жаңартылатын ресурстарды дамыту жөніндегі ұлттық стратегияны қабылдауға бастамашылық етеміз. Субсидиялар беру қағидаларын жеңілдетуге және олардың тұрақтылығын қамтамасыз етуге ерекше назар аударылатын болады.

1.3. Еңбек қатынастары

Біздің экономикалық стратегиямызда әділетті еңбек қатынастарының маңызы зор. Біз әділетті жалақының, қауіпсіз еңбек шарты мен кәсіби өсу үшін қажетті мүмкіндіктердің жасалуына қол жеткіземіз.

Жұмысшылардың мүдделерін қорғайтын кәсіподақ қозғалысы – партияның басты әлеуметтік серіктесі. Біз үшін негізгі басымдық – отандастарымыздың еңбек құқықтарын қорғау және кәсіподақтармен тығыз ынтымақтастықта әлеуметтік әділеттікті қамтамасыз ету.

2-БӨЛІМ: АУЫЛДЫ ҚОЛДАУ

Біздің партия ауылды аумақтардың теңдестірілген дамуын қамтамасыз ету үшін заманауи және тұрақты тәсілдерді енгізу арқылы ауыл экожүйесін даярлауды қолдау бойынша шаралар қабылдайды. Аталған жұмыстың соңғы нәтижесі шаруашылықты тиімдірек жүргізуге қажетті жағдайды жасау арқылы өз мүшелерінің әл-ауқатын айтарлықтай жақсартатын кооперация болуы мүмкін.

2.1. Ауылды аймақтарда тұрақты инфрақұрылым құру

Ауылдық жерлердің тұрақты дамуын қамтамасыз ету мақсатында біздің партия тұрақты инфрақұрылым қалыптастыруға бағытталған бағдарламалардың даярлануы мен ұсынылуына қол жеткізеді. Бұл жұмыс үш бағытта жүзеге асырылады:

– әлеуметтік инфрақұрылым. Бұл ауыл тұрғындарының сапалы білім беру жүйесіне, медициналық қызметке, мәдени демалыс мүмкіндіктеріне қол жеткізуін білдіреді;

– инженерлік инфрақұрылым. Бұл аумақтық коммуналдық және жол шаруашылықтары тұтас жүйесінің қалпына келтірілуін білдіреді;

– өндірістік инфрақұрылым. Осы мақсатта ауылдық аумақтардың дамуын қолдауға (заманауи өндіріс объектілері мен инфрақұрылымның салынуын қоса алғанда) арналған бағдарламалар мен инвестициялық жобалар іске қосылады.

Бұдан бөлек, «Ауыл» партиясы шекара маңы аумақтарының маңыздылығын есепке ала отырып, әскери қызмет зейнеткерлері мен балалар үйлерінің түлектері үшін ауылдық аумақтарда оларды ауыл шаруашылығы мен аралас салаларда жұмыспен қамтитын шағын әрі жинақы елді мекендердің салынуына бастамашылық етеді.

2.2. Экологиялық тұрақты ауыл шаруашылығын қолдау

Біз тиімділікті қоршаған ортаны қорғаумен үйлестіретін ауыл шаруашылығының маңыздылығын жете түсінеміз. Партия ауыл шаруашылығындағы экологиялық тұрақты өндірісті ынталандыруға бағытталған субсидия жүйесін енгізу бойынша шаралар қабылдайды.

Агроөнеркәсіптік кешеннің тұрақты дамуы Су ресурстарының қолжетімділігіне тікелей байланысты. Сондықтан біз теңдестірілген су саясатын іске асыруға және трансшекаралық суды тиімді пайдалану мәселелерін шешуге қол жеткізетін боламыз.

Климаттың өзгеруі мәселесінің өзектілігін ескере отырып, біз жаңа климаттық жағдайларға бейімделу бойынша нақты іс-қимыл жоспарын қабылдауға бастамашы боламыз. Сонымен бірге, біз, азық-түлік тауарларын өндіру үшін ауыл шаруашылығына арналған, айналымнан шығарылған жерді барынша пайдалануға қол жеткіземіз.

2.3. Ауыл кәсіпкерлігін дамытуды қолдау

Біз ауылда кәсіпкерліктің дамуы экономикалық өсу мен жаңа жұмыс орындарының ашылуына ғана емес, сонымен бірге жергілікті қоғамдастықтар тұрақтылығын қамтамасыз етуге, олардың тауар мен түрлі қызметке қолжетімділігін арттыруға, инфрақұрылымды жақсартуға әрі ауылды жерлердің әлеуметтік дамуына ықпал ететініне нық сенімдіміз. Бұл үшін ауыл тұрғындарының кәсіби машықтарын арттыратын және олардың кәсіпкерлік белсенділігін дамытатын оқыту бағдарламаларын енгізуге қол жеткіземіз.

Біз жасыл және цифрлық трансформацияға бағытталған модельді фермаларды құру шараларын қолға аламыз. Жергілікті жердегі кәсіпкерліктің дамуына қуатты катализатор болатын жеке қосалқы шаруашылықтарды дамыту бағдарламасын ілгерілетумен айналысамыз. Біз «Бір ауыл – бір өнім» қағидатының мұнда өз өміршеңдігін көрсетіп, жергілікті тұрғындар үшін тұрақты табыс әкеліп қана қоймай, нарық назарын аударатын бірегей және бәсекеге қабілетті өнімдерді жасауға ықпал ететініне сенімдіміз.

2.4. Ауыл туризмі мен экомәдени бастамаларды қолдау

Біз ауылдық қауымның ерекше табиғаты мен мәдениетін мойындаймыз. Ауыл экомәдени бастамаларды қолдау мақсатында, біз, ауыл туризмін дамытып, экомәдени бастамаларды қолдау арқылы биологиялық әралуандық пен ауыл өмірінің дәстүрлерін сақтауға және оларды үнемі назарда ұстауға қолдау көрсетеміз.

3-БӨЛІМ: ӘЛЕУМЕТТІК САЯСАТ

Партияның әлеуметтік саясаты әлеуметтік топтардың, бастысы, адамның дамуына бағытталған. Әлеуметтік қамсыздандыру, денсаулық сақтау мен білім беру салалары, сонымен бірге отбасы мәселелері ерекше назарда болады.

3.1. Зейнетақы жүйесін реформалау

Біз қарттарымыздың өмір сүру сапасы мен деңгейін арттыру мақсатында отандық зейнетақы жүйесін үздік әлемдік тәжірибелер негізінде реформалауға алғашқылар қатарында қол жеткіземіз. Мұндағы біз үшін ең басты қағидат – адам өз активтерінің қожайыны және оларды өзі басқаруы тиіс.

Партия зейнетке шығу жасына өзгеріс енгізу, зейнетақыны есептеудің формуласын қайта қарау, зейнетақы жинақтары тетіктерін жақсарту, сонымен қатар халықтың зейнетақы жүйесіне қатысты қаржылық сауаттылығын арттыратын бағдарлама даярлау сияқты бірқатар шараға бастамашы болады.

3.2. Білім беруге қатысты тәсіл

Біз білім беру жүйесінің қоғамның болашағы үшін маңызы зор екенін мойындаймыз. Біздің бар күшіміз халықтың барлық тобы үшін жоғары сапалы білімге жол ашатын білім беру бағдарламаларын қолдауға бағытталады. Сондай-ақ өңірлердің мамандануын ескере отырып, ауылдық жерлерде заманауи, технологиялық тұрғыдан жабдықталған мектептер мен агроколледждердің салынуына қол жеткіземіз.

Біз ауыл мектептерінің түлектері үшін негізгі міндеті әлеуметтік, ауыл шаруашылығы мен ветеринарлық мамандықтар бойынша кадрлар даярлайтын «Ауылдан диплом үшін!» жобасын іске қосамыз. Ауылды жерде еңбек еткісі келетін жас мамандар үшін жекешелендіру құқығы берілген тұрғын-үй салу бағдарламасын іске қосуға бастамашы боламыз.

Ауылдардағы маман тапшылығын ескере отырып, ауыл шаруашылығы мамандары мен әлеуметтік сала қызметкерлері үшін еңбек өтілін бір жарым еселік мөлшерде есептеуге қол жеткіземіз. Сонымен бірге ауыл тұрғындарын шаруашылық жүргізу машықтарына оқытатын білім таратудың Ұлттық жүйесін құруға бағытталған шараларды қолға аламыз.

Үкімет пен қоғам тарапынан кешенді ұстаным мен қолдауды талап ететін маңызды мәселенің бірі – күштік құрылым зейнеткерлерін, спортшылар мен қиын өмірлік жағдайда қалған балаларды азаматтық өмірге бейімдеу. «Ауыл» партиясы тиісті білім беру бағдарламасын даярлауға қол жеткізеді.

3.3. Денсаулық сақтау және әлеуметтік қамсыздандыру

Біз сапалы медициналық қызметке қолжетімдікті қамтамасыз етуге бағытталған денсаулық сақтау жүйесіне үлкен мән береміз. Ол үшін біз ауылдық аймақтардың медициналық қызметтерге қолжетімділігін жақсартуға ықпал ететін «Ауыл дәрігері» жобасына бастамашыл боламыз. Біз аталған жобаның ауыл тұрғындарының өмір сүру сапасын арттыруға сеп боларына, медициналық көмекке қол жеткізудегі қала мен ауыл арасындағы алшақтықты азайтуға мүмкіндік беретініне сенімдіміз.

Жағдайлары тым төмен жандарға арналған әлеуметтік бағдарламалар да басты назарымызда болады.

3.4. Отбасылық саясат

Отбасы құндылықтарын қолдау – әлеуметтік саясатымыздың негізі. Біз отбасыларға қолайлы орта қалыптастыратын (тұрғын үй бағдарламаларын, балалар жәрдемақысы мен қолдаудың өзге де формаларын қоса алғанда) шаралардың жүзеге асырылуына қол жеткіземіз.

Осы мақсатта, біз, Қазақстанда отбасыларды қаржылық қолдаудың «ана капиталы» мемлекеттік бағдарламасын іске қосу, ең төменгі жалақыдан төмен емес деңгейде балалары бар аналарға ай сайынғы жәрдемақыларды белгілеу, жас отбасыларды тұрғын үймен қамтамасыз ету бойынша түсінікті және пәрменді бағдарламаларды енгізу жөнінде шаралар қабылдаймыз.

4-БӨЛІМ: ЖАСТАРДЫҢ ЖАҢА САПАЛЫҚ ҚАСИЕТІН ҚАЛЫПТАСТЫРУ ЖӘНЕ ОЛАРДЫҢ БАСТАМАЛАРЫН ҚОЛДАУ

Жастардың, ең алдымен, көшпелілер дәстүрі мен құндылықтарының мұрагерлері ретінде партиямыз үшін рөлі өте зор. Олар бүкіл елдің дамуына ықпал ететін инновациялар мен қуат әкеледі.

Біз жастардың жаңа сапалық қасиеттерін қалыптастыру мен олардың бастамаларын қолдау заманауи қоғамдағы табысты әрі креативті өмір сүруге қабілетті, белсенді әрі жауапкершілігі жоғары буынды қалыптастыруға бағытталған басты қадам деп есептейміз.

4.1. Жастар арасында еңбекке құрметті насихаттау

Еңбекқорлық, іскерлік пен жауапкершілік, білім алу мен өзін-өзі дамытуға ұдайы ұмтылыс – үйлесімді тұлғаның бұл аталған қасиеттерінің барлығы да еңбек адамына тән. Ыждағатты еңбек әрдайым жетістіктерге жетелеп, ал жоғары санатты мамандар барлық саланың дамуын қамтамасыз етеді.

Біз өз ісінің мамандары ғана қоғамның басты назарында болуы, ал жастардың оларға еліктеуі тиіс екеніне сенімдіміз. «Еңбек адамды, ал адам өз дәуірін көрікті етеді» деп бекер айтылмаса керек. Сондықтан біз қоғамда, әсіресе жастар арасында еңбек адамдарын дәріптеумен белсенді түрде айналысамыз.

4.2. Тұлғалық дамуға қажетті білім ортасын қалыптастыру

Біз жастардың жаңа қасиеттері мен тұлғалық дамуын арттыруға бағытталған арнайы мамандандырылған білім беру алаңын қалыптастыруға күш саламыз. Көшбасшылық саласын, креативтілік пен әлеуметтік жауапкершілікті қамтитын аталған орта жастарды жан-жақты интеллектуалды дамытуға бағытталады.

4.3. Жастардың инновациялық бастамаларын қолдау

Біздің партия жастардың инновациялық бастамаларын белсенді қолдауға бағытталған шараларды қабылдайды. Бұған, соның ішінде жас көшбасшылардың шығармашылық көзқарасын ынталандыру және өмірдің әртүрлі саласында инновациялық шешімдерді енгізу мақсатында олар ұсынған жобаларды қаржыландыру үшін қор құру кіреді.

5-БӨЛІМ: МЕМЛЕКЕТТІК БАСҚАРУ МЕН ӨЗІН-ӨЗІ БАСҚАРУ ЖҮЙЕСІН ЖЕТІЛДІРУ

Біз мемлекеттік басқару мен өзін-өзі басқару жүйесін одан әрі реформалау ашық әрі тиімді қоғамға апарар жолдағы, азаматтардың шешім қабылдау үдерістеріне белсенді қатысуындағы маңызды қадам деп есептейміз.

Сол үшін біз негізгі институттардың қалыптасуына азаматтардың қатысуын қамтасыз етуді жақтаймыз. Біз оның өз кезегінде, азаматтарға өз қаласы мен қоғамдастығының болашағын айқындауға белсенді қатысу мүмкіндігін беретініне сенімдіміз.

5.1. Әкімдерді сайлау: шынайы өзін-өзі басқаруды дамыту

«Ауыл» партиясы Президенттің аудан және облыстық маңызы бар қала әкімдерінің сайланбалығын дамыту идеясын қолдайды. Себебі тікелей сайлау демократиялануға бағытталған нақты векторды көрсетеді.

Сайлау тұрғындардың өз сұраныстары мен мүдделеріне сәйкес келетін көшбасшыларды таңдау арқылы аумақтарын басқаруға тікелей мүмкіндік береді. Бұл әкімдерді тиімдірек әрі ашық жұмыс істеуге ынталандырады.

Әкімдерді сайлау азаматтық қоғамның дамуына ықпал ететін болады. Бұл қоғамның тұрақты дамуына негіз болатын саяси ақпарат алу мен азаматтық белсенділіктің өсуіне ықпал етеді.

Әкімдердің сайлануы билікке деген сенімнің артуына ықпал етеді. Азаматтар өз қалалары мен аудандары басшыларының сайлануына тікелей ықпал ете алатынын көргенде олардың мемлекеттік институттарға деген сенімі артады. Бұл өз кезегінде елдегі әлеуметтік тұрақтылықтың нығаюына және жалпы климаттың жақсаруына әсер етеді.

5.2. Сот жүйесі: ашықтық және сайланбалық

Біз сот жүйесінің ашықтығы мен тәуелсіздігін жақтаймыз. Ол үшін біз аудандар мен облыстық маңызы бар қалалар деңгейінде азаматтардың алқа билерге дауыс беру тетігін енгізуді ұсынамыз.

Біз сот корпусы құрамын дауыс беру арқылы айқындауға халықтың белсенді қатысуы сот жүйесіне деген сенімді қамтамасыз ететініне сенімдіміз.

5.3. Қоғамдық қауіпсіздікті жетілдіру

Біз қоғамдағы қауіпсіздік пен сенімнің маңыздылығын мойындаймыз. Сондықтан біздің партия құқық қорғау органдарын кәсібилендіруге, әдептілікке және жауапкершілікке бағытталған полиция реформасын жүргізуді жақтайды.

Осыған байланысты, біз ауылдық жерлердегі учаскелік полиция инспекторларын халықтың сайлауын енгізу арқылы қоғамдық қауіпсіздік жүйесін реформалайтын боламыз.

ҚОРЫТЫНДЫ

Біздің бағдарлама – қоғамды дамытудың кешенді ұстанымы.

Біздің партия қазақстандықтарды теңдестірілген, тұрақты және орнықты қоғам құру үшін құндылықтарымыз бен мұраттарымыз айналасында бірігуге шақырады.

Біз еліміздің өркендеуін қамтамасыз ету үшін азаматтармен және басқа да саяси күштермен жұмыс істеуге дайынбыз.
